




COMUNE DE ARDAULE
Ufitziu Limba Sarda

Su contu de

Tuguddeddu Ruju



Su contu de

Cuguddleddu Ruju



Una borta b'aiat una bidda pitica e bella, inghiriada dae montes e cun una turre de crèisia chi si pesaiat arta arta finas a chelu.

Pròpiu in s'oru de sa turre b'aiat una domo in ue istaiat sa protagonista de cesta istòria.

Fiat una pipia de noe annos, simpàtica e bellighedda, e totus la mutiant *Cuguddleddu Ruju* ca sa mama, a sos oto annos, l'aiat donadu unu cuguddu coloradu (belligheddu a beru) chi sa pipia si poniat semper, cando essiat a intro de bidda.

Su babbu de *Cuguddleddu Ruju* fiat segalinna. Che a totu sos àteros chi fiant in cussu logu, sa famillia sua non teniat cosa meda ma, cun sa linna chi regolliat su babbu, istaiant bastante bene.

Mancari gasi, in sas ùrtimas dies sos segalinna fiant pistighingiados ca aiant bidu unu lupu mannu-mannu bardanende in sos padentes e ponende a timere sa gente¹.



dreamstime.com



dreamstime.com

Cun cussu animale in cue a fùrriu, su traballu fiat semper prus, e prus perigulosu.

Una die sa mama de *Cuguddleddu* aiat cotu unas cantas cocois durches, e deretu aiat pensadu de nde li dare parte, in presente, a sa mama (sa giaja de *Cuguddleddu*) chi istaiat a s'àtera ala de su padente². E gasi aiat tzerriadiu sa figia e l'aiat naradu:

¹ *Bardanende in sos padentes* = 'Che faceva razzie di bestiame nei boschi'.

² *Padente* = 'Bosco'.

"Bae e lea·nche custas cocois a giaja tua. Narant chi est unu pagu malàida, e de seguru l'at a agradare chi nos ammentemus de issa. Ah, piga finas unu botigheddu de butiru³ dae sa mesa serrada!"

Cuguddleddu aiat postu in mente deretu e, acontzende·si su cuguddu in dae in antis de s'ispigru, fiat essida dae domo saludende sa mama, cun sas cocois e su botigheddu in manu.

"E ista atenta a su lupu!!!" l'aiat racumandadu sa mama "Sighi semper su caminu mannu, no iscanses e torra dereta!"

Cuguddleddu aiat naradu chi ei, ma (a nàrrere sa beridade) comente faghiat a istare atenta a su lupu, cando chi no ischiat mancu comente fiat fatu cussu personàgiu tìmidu dae totus?

E gasi fiat essida dae bidda brinchende allegra e firmende·si cando-non-cando pro pigare su nuscu de sos frores chi agataiat in caminu.

E su chi deviat capitare est capitadu: su lupu fiat cuadu in palas de sas matas, mortu de gana.



Persighidu dae sos segalinna, in sas ùrtimas chidas aiat mandigadu petzi fògia e raighina. Màndigu mìseru pro un'animale che a issu, chi li tirat de prus sa petza!

Siat comente si siat, comente aiat pigadu fragu de petza frisca non si fiat postu a pensare meda e fiat brincadu deretu a su caminu, de fronte a Cuguddleddu.

"Bonas dies, pipiedda!" si fiat presentadu, linghende·si gaias las lavras. "A ue ses andende, si potzo preguntare?"

Cuguddleddu no aiat pensadu in su malu, bidende·lu. Li fiat pàssidu ebbia chi cussu personàgiu fiat prus pilosu chi non sa gente comuna.

"So andende a domo de gaja mia" aiat rispostu "ca est malàida e so leende·nche·li cocoeddas e butiru."

Su lupu timiat a si nche la mandigare in cue, ca a s'oru bi podiat àere carchi segalinna. E gasi s'at istudiadu una trassa.

"A l'ischis ite faghimus...?" l'at naradu "Ti propòngio unu giogu".


"Andat bene!" at rispostu Cuguddleddu "Sos giogos m'agradant meda!"

"In ue istat gaja tua?" at naradu su lupu.

"In s'àtera ala de su padente, in una domo cun sa cobertura a tèulas".

"Tando... Deo apo a pigare custu caminu a manu manca, chi est prus longu, e tue custu àteru chi est prus curtzu. Bidimus chie arribat in antis!"

Cuguddleddu aiat atzetadu e su lupu fiat móvidu deretu, currerde in su caminu chi s'ait seberadu (chi, est craru, fiat su prus curtzu).





COMUNE DE ARDAULE

Ufitziu Limba Sarda



Duncas fiat arribadu deretu a domo de sa gaja, cando chi Cuguddleddu fiat ancora a mesu caminu.

Aiat pichiadu a sa ghenna de cussa domo.

"Chie est?" aiat domandadu sa gaja, dae intro.

"So Cuguddleddu, neta de Vostè..." aiat naradu su lupu, cun boghe de pipiedda. "L'apo giutu cocoeddas e butiru".

Sa gaja si nde fiat pesada e, tzòpiga-tzòpiga, fiat andada a abèrrere sa ghenna. Apenas chi cussa nd'aiat

pesadu s'istanga, su lupu li fiat brincadu a pitzu, ghetende nche la a terra.

Fiat a si nche la mandigare luego, però pensende a sa petza modde de Cuguddleddu (chi de seguru fiat a canta a arribare a sa domita) aiat preferidu a s'arregòllere sa gaja pro pustis, a bias no esseret abarradu ancora famidu.

In unu paterfilius, aiat acapiadu sa gaja e nche l'aiat serrada in un'armuà.

Tando s'aiat postu unu bestire betzu e unu boneteddu de lana in conca, e si fiat corcadu in su letu, isetende totu pistighingiadu.

In s'ìnteri, Cuguddleddu fiat currende semper prus a bellu. Su padente fiat prenu de chentu meravìllias: àrbores mannas, lèperes agiogatzados, frores de ogni colore, e totu fiat s'occasione pro istentare e pro non s'ammentare de sa missione chi l'aiat dadu sa mama. A su puntu chi, cando at pichiadu a sa ghenna de sa domo, mancu s'ammentaiat prus de sa posta chi aiat fatu cun cussu personàgiu pilosu.

"Chie est?" narat su lupu dae intro, istorchende sa boghe dèbile de sa gaja.

"So Cuguddleddu, sa neta de Vostè. Nche li so giughende sas cocoeddas e su butiru chi m'at dadu mama pro Vostè" rispondet sa pitzinna.

"Cola, cola... Sa ghenna gai est aberta".





Cuguddleddu fiat intrada a intro de domo. Sas ventanas fiant serradas e, in s'iscuru, non si bidiat nudda. Su lupu, totu imboligadu in sos lantzolos, l'aiat fata acurtziare a su letu.

"Piga cussa cadira e setzi·ti inoghe a s'oru meu" aiat naradu cussu lupu trasseri.

Comente si nche fiat abituende a s'iscuru, Cuguddleddu aiat incumintzadu a annotare chi sa giaja teniat una bisura⁴ curiosa.

"Ite origras mannas chi tenet, giaja mia!" aiat naradu. (Su lupu aiat proadu a nche las istichire de prus suta de su bonete).

"Est pro t'ascurtare mègius!" aiat rispostu.

"E cussos ogros... Ite mannos chi sunt!"

"Est pro ti biderè mègius, minninedda mia..."

Tando Cuguddleddu, acurtziende sa conca a sa cara de s'animale, aiat bidu cussa buca manna-manna e sas dentes de su lupu.

"Ihhh!! Ite buca e ite dentes mannas chi tenet, giaja mia!" aiat naradu.

"Eh, bastat gosi cun sa tzarra!" aiat aboghinadu su lupu. "Custas dentes gosi mannas sunt pro mi bènnere mègius a ti nche mandigare!" e brinchende a subra de sa pipia si nche l'aiat ingurtida, agiomai sena tirare àlidu.

Pustis chi si fiat bene consoladu, poderendesi sa bentre manna-manna e bene prena, su lupu aiat caminadu, istracu, finas a arribare a unu logu friscu, pro ismartire cussu bucone saboridu.



⁴ Bisura = 'Aspetto, figura'.



Prus a tardu, fiat capitadu chi su babbu de Cuguddleddu, acumpangiadu dae àteros segalinna, fiat coladu a s'oru de sa domo de sa gajja e aiat detzìdidu de intrare a la saludare.

No aiat istentadu meda a l'agatare, ligada e serrada in intro de s'armuà.

"Ite malasorte!" repitiat cussa fèmina "Su lupu si nch'at mandigadu a figia tua e deo no apo pòdidu fàghere nudda contra!"

Disisperadu, su babbu de Cuguddleddu aiat incumintzadu a chircare cussa fera pro la ochiere.

E mancari sas làgrimas pro sa pèrdida de sa figia l'impediant de bider craru, non nche fiat passada mancu mesora pro agatare su lupu, ca si fiat fuliadu in terra, bentre a susu, cun sa conca imbarada a una mata e si fiat dormidu, sorroghende a forte.

"Custa at a èssere s'ùrtima fatura tua!" aiat naradu su segalinna.

E, pesende in àeras sa sigure, si fiat dispostu a bi l'iscùdere a conca a su lupu. Ma si fiat firmadu deretu ca li pariat de intèndere una boghighedda chi essiat dae sa bentre de cussu animale. E sa boghe repitiat:

"Agiutòriu! Agiutòriu! Ello non b'at nemos chi mi nche boghet dae inoghe?".

Su segalinna aiat reconnotu sa boghe de sa figia: Cuguddleddu fiat galu bia!

Tando, a bellu a bellu, aiat incumintzadu a segare sa pedde de sa bentre de su lupu, finas chi nd'aiat bidu essende sa conca de Cuguddleddu, totu assuconada e treme-treme.



"Babbu meu, babbu meu! Ite assuconu chi apo tentu!" si fiat ghetada a mesu de sos bratzos de su babbu, chi tando aiat cumpresu ite fiat capitadu: su lupu si nch'aiat ingurtu a Cuguddleddu sena la mastigare, e mancu male su segalinna fiat arribadu a s'ora giusta, ca su sonnu de a pustis pràngiu fiat gasi profundu chi cussa fera non si fiat mancu acatada chi su segalinna fiat aperende·ddi sa matza.

"Curre a bidda e nara a totus chi non si devent prus pònnere pensamentu pro su lupu!" aiat naradu su segalinna a sa figia.

Cuguddleddu si nche fiat andada e su segalinna aiat prenu sa bentre de su lupu cun pedras mannas e luego aiat cosidu s'abertura cun cuidadu. E si nche fiat andadu, lassende sa fera dormida, sena chi s'esseret abigiada de nudda.

A merie, a tardu, su lupu si nche fiat ischidadu, ma non resessiat mancu a abarrare ritzu ca ruiat deretu, a su pesu chi teniat in bentre.

"Custa pipia m'at cumbinadu male!" aiat naradu "E deo creende chi sa petza sua esseret prus modde de unu bistocu!"

Caminende tòntona-tòntona, fiat resessidu a arribare a s'oru de su riu. Teniat gana de bufare abba meda, pro si nche catzare su sidis chi teniat.

E gai si l'aiat fata, però! No aiat galu acurtziadu su murru a s'abba, chi su pesu de sa pedra l'aiat bortuladu a dae in antis e nche fiat rutu in su riu, sena nde pòdere essire prus ca fiat tropu pesante.

A pustis de totu su chi fiat capitadu, in su padente fiat torrada sa paghe, e sos segalinna como podiant sighire a traballare sena tìmere a nemos. E Cuguddleddu, dae tando, aiat incumintzadu a connòschere sos lupos (mancari, pro bona sorte sua, non nd'apat agatadu prus mancu unu in caminu).



Leadu dae unu contu de Charles Perrault bortadu in sardo dae Diegu Corràine
Testu addatadu a manera libera pro s'iscola materna de Ardaule